

Reforma za evropsku budućnost



Priključenje Bugarske i Rumunije Evropskoj uniji 1. januara predstavlja ostvarenje dugoročnog političkog cilja za obje zemlje – cilja koji većina njihovih građana posmatra kao garanciju budućeg mira i prosperiteta.– što bi takođe trebalo djelovati kao poticaj političarima i građanima Bosne i Hercegovine da provedu reforme koje su neophodne kako bi i ova zemlja veoma brzo krenula istim putem, napisao je visoki predstavnik i specijalni predstavnik Evropske unije, Christian Schwarz-Schilling, u svojoj sedmičnoj novinskoj rubrici.

“Reforme koje se traže od Bosne i Hercegovine će donijeti stvarne prednosti”, gospodin Schwarz-Schilling je napisao u svojoj rubrici koja je objavljena u *Večernjem listu*, *Nezavisnim novinama* i *Dnevnom avazu*. “Ako se uspješno uvedu temeljite promjene u oblastima ekonomije, pravosuđa, policije, oružanih snaga, sistema javnog emitovanja kao i u drugim sferama, kako bi se ispoštovali standardi EU, građani ove zemlje mogu očekivati da će uživati sve one beneficije koje građani Evropske unije već uživaju.”

Visoki predstavnik i specijalni predstavnik Evropske unije je naglasio da je integracija imala veoma snažan uticaj na sve zemlje koje danas čine Evropsku uniju i da je pomogla da se stvore mir, prosperitet i nove mogućnosti, bez premca. “Svi mi koji smo lično iskusili najmračnije dane Evrope i od tada poživjeli dovoljno dugo da doživimo da se Evropska unija toliko razvije da obuhvati i zemlje koje su nekada bile dio Istočnog bloka, razumijemo kako daleko i kako brzo se društva mogu kretati kada idu pravim putem”, napisao je visoki

predstavnik.

Gospodin Schwarz-Schilling je dao ilustraciju mogućeg rasta tako što je opisao transformaciju Irske od jedne od najsiromašnijih zemalja u Evropi u ranim 70-tim do jedne od najbogatijih u kasnim 90-tim godinama prošlog vijeka. "Ekonomsko čudo u Irskoj je počelo sa reformama koje su bile uslov za članstvo u EU, a intenzivirane su kada su počela pristizati finansijska sredstva EU za modernizaciju infrastrukture u zemlji, nakon čega je uslijedio veliki priliv investicija iz Evrope i Sjedinjenih Američkih Država," napisao je visoki predstavnik. "To je model koji sada koriste Bugarska i Rumunija, i to je model koji bi mogla koristiti i Bosna i Hercegovina."

"Ova zemlja, također, može ostvariti brz napredak i dobiti vlastito ekonomsko čudo, zaključio je gospodin Schwarz-Schilling. "Ali to će se desiti samo ako izabrani zvaničnici Bosne i Hercegovine iskoriste naredne mjesec da se usredsrede na program reformi i osiguraju potpisivanje sporazuma o stabilizaciji i pridruživanju sa Evropskom unijom, što je prvi korak na putu ka eventualnom članstvu."

Tekst sedmične rubrike visokog predstavnika/specijalnog predstavnika Evropske unije možete naći na www.ohr.int i www.eusrbih.org.